





駱賓王集序

魯國郗雲卿

駱賓王婺州義烏人也年七歲能屬文高宗朝與盧照隣楊炯王勃文詞齊名海內稱焉號為四傑亦云盧駱揚王四才子仕至侍御史後以天后即位頻貢章疏諷諫因斯得罪貶授臨海丞文明中與敬業於廣陵共謀起義兵事既不捷因致逃遁遂致文集悉皆散失後中宗朝降勅搜訪賓王詩筆令雲卿集

焉所載者即當時之遺漏凡十卷此集並是  
家藏者亦足傳諸好事

駱賓王集卷上

賦

螢火賦

余猥以明時久遭幽繫見一葉之已落知四  
運之將終悽然客之為心乎悲哉秋之為氣  
也光陰無幾時事如何大塊是勞生之機小  
知非周身之務嗟乎綈袍匪舊白首如新誰  
明公治之非孰辨臧倉之愬是用中宵而作  
達旦不瞑覩茲流螢之自明哀此覆盆之難

照夫類同而心異者龍蹲歸而宋樹伐質殊而聲合者魚形出而吳石鳴苟有會於精靈夫何患於異類况乘時而變含氣而生雖造化之不殊亦昆蟲之一物應節不憊信也與物不競仁也逢昏不昧智也避日不明義也臨危不懼勇也事有公情而動興因物而多懷感而賦之聊以自廣云耳

伊玄功之播氣有丹鳥之賦象順陰陽而亭毒資變化而涵養每寒潛而暑至若知來而歲往既發揮以外融亦含光而內朗若夫小暑南收大火西流林塘改夏雲物迎秋忽凌虛而赴遠乍排叢而出幽如火色之宵映如夜光之暗接逝將歸而未返忽欲去而中留入槐榆而熠發若改燧而環周繞堂皇而影遍疑秉燭以嬉遊點綴懸珠之網隱映落星之樓乍滅乍興或聚或散居無定所習無常翫曳影周流飄光凌亂泛艷乎池沼徘徊乎林岸狀火井之沉熒似明珠之出漢值衝颺

而不烈逢滂雨而逾煥炤灼兮若湛盧之夜  
飛灼爍兮像招搖之夕輝與庭燎而相炫然  
重陰於己昏共爍火而齊息避太陽於始旦  
爾其光不周物明足自資偶仙鼠而伺夜對  
飛蛾之赴熖類君子之有道入暗室而不欺  
同至人之無迹懷明義以應時處幽不昧居  
照斯晦隨隱顯而動息候昏明而進退委性  
命兮幽玄任物理兮推遷化腐木而含彩集  
枯草而葳煙不貪熱以苟進每和光而曲全

豈如鎔金而自爍寧學膏火之相煎陋蟬蛸  
之習蛻怵螻蟻之慕羶匪傷蜉蝣之夕不羨  
龜鶴之年愴榆飛而控地搏扶起而垂天雖  
小大之殊品豈逍遙之異筌夫何化之斯化  
無使然而自然若乃有來斯通無往不至排  
朱門而獨遠昇青雲而自致匪偷光於鄰壁  
寧假輝於陽遂終徇己以致能靡因人而成  
事物有感而情動迹或均而心異響必應之  
於同聲道固求之於同類始未明於趨捨庸

詎識其指意子尚不知魚之爲樂吾又安能  
知螢之爲利高明兮有融遷變兮無窮哀牛  
倏而化虎羽泉忽兮生熊血三年而藏碧魂  
一變而成虹知戰場之有憐悟冤獄之爲蟲  
彼翔飛之弱質尚矯翼之凌空何微生之多  
躓獨宛頸以觸龍異璧光之照庶同劍影之  
埋豐覬道迷而可復庶幽鑒而或通覽光華  
而自照願形影以相弔感秋夕以殷憂歎宵  
行以熠燿熠燿飛兮絕復連殷憂積兮明且  
煎見流光之不息愴驚魂之屢遷如過隙之  
已來同奔電兮忽焉儻餘光之可照庶寒灰  
之重然

蕩子從軍賦

胡兵十萬起妖氛漢騎三千掃陣雲隱隱地  
中鳴戰鼓迢迢天上出將軍邊沙遠離風塵  
氣塞草長萎霜露文蕩子辛苦十年行回首  
關山萬里情遠天橫劍氣邊地聚笳聲鐵騎  
朝常警銅焦夜不鳴抗左賢而列陣屯右校

以疏營滄波積凍連蒲海雨雪凝寒遍柳城  
若乃地分玄微路指青波邊城暖氣從來少  
關塞寒雲本自多嚴風凜凜將軍樹苦霧蒼  
蒼太史河既拔距以從軍且揚麾而挑戰征  
旆凌沙漠戎衣犯霜霰樓船一舉爭沸騰烽  
火四連相隱見戈文耿耿懸落星馬足駉駉  
擁飛電終取俊而先鳴豈論功而後歿征夫  
行樂踐榆溪倡婦銜怨坐空閨靡蕪舊曲終  
難贈芍藥新詩豈易題池前怯對鴛鴦伴庭

際羞看桃李蹊花有情而獨笑鳥無情而恒  
啼蕩子別來年月久賤妾空閨更難守鳳凰  
樓上罷吹簫鸚鵡杯中寧勸酒聞道書來一  
鴈飛此時絨怨下鳴機裁鴛帖夜被薰麝染  
春衣屏風宛轉蓮花帳窓月矜朧翡翠帷箇  
日新粧如復罷祗應含笑待君歸

五言雜詩

夏日遊德州贈高四

夫在心為志發言為詩詩有不得盡言言有



不得盡意僕少負不羈長逾虛誕讀書頗存  
涉獵學劍不待窮工進不能矯翰龍雲退不  
能棲神豹霧撫循諸已深覺勞生而太夫人  
在堂義須捧檄固仰長安而就日赴帝鄉以  
望雲雖文闕三冬而書勞十上嗟乎入門自  
媚誰相謂言致使君門隔於九重中堂遠於  
千里既而交非得免路是亡羊敬上弊廬竭  
來初服遂得載披玉葉款洽金蘭傾意氣於  
一言締風期於千祀雖交因氣合資得意以

敦交道契言忘少寄言而筌道是以輕投木  
李以代踈麻章句繁蕪心神媿慙庶雅韻  
竚辱報章則覲連星開龍文於劍匣素輝  
虧月頻驪頷於珠胎云爾

日觀隣全趙星臨俯舊吳隔津開巨寢稽阜  
鎮名都紫雲浮劍匣青山孕寶符封疆恢霸  
道問鼎競雄圖神光包四大皇威震八區風  
煙通地軸星象正天樞天樞限南北地軸殊  
鄉國闢門通舜賓比屋封堯德言謝垂鈞隱

來參負鼎職天子不見知群公詎相識未展  
從東駿空戢圖南翼時命欲何言撫膺長歎  
息歎息將如何遊人意氣多白雲梁山曲寒  
風易水歌泣魏傷吳起思趙切廉頗淒斷韓  
王劔生死翟公羅羅 翟公意劔負韓王氣  
驕餌去易論忌途良可畏夙昔懷江海平生  
混涇渭千載契風雲一言忘賤貴去去訪林  
泉空谷有遺賢言投爵里刺來泛野人船締  
交君贈縞投分我忘筌成風郢匠斲流水伯

牙絃牙絃忘道術漳濱恣閑逸聊安張蔚廬  
詎掃陳蕃室虛室狎招尋敬愛混浮沉一諾  
黃金信三復白珪心霜松貞雅節月桂朗冲  
襟靈臺萬頃濬學府九流深談玄明毀壁拾  
紫陋籛金鷺濤開碧海鳳彩綴詞林林虛星  
華映水澈霞光淨霞水兩分紅川源四望通  
霧卷天山靜煙銷太史空烏聲流向薄蝶影  
亂芳叢柳陰低 水荷氣上薰風風月芳  
節物華紛可悅將歡促席賞遽爾又歸別積

水帶吳門通波連禹穴贈言雖欲盡機心庶  
應絕潘岳本自閑梁鴻不因熱一飄欣狎道  
三月聊棲拙棲拙隱金華狎道訪仙查放曠  
愚公谷消散野人家一頃南山豆五色東陵  
瓜野衣裁薜葉山酒酌藤花白雲離望遠青  
溪隱路賒儻憶幽巖桂猶異折踈麻

在江南贈宋五之問

井絡雙源濬陽侯九派長淪波通地穴委輸  
下歸塘別島籠朝蜃連洲擁夕漲韞珠成積

潤讓壁動浮光浮光疑折水積潤踈圓吐玉  
輪涵地開劔匣連星起風煙標迥秀英靈信  
多美懷德踐遺芳端操慙謀已謀已謬觀光  
牽迹強恓惶揆拙迷三雀勞生昧兩忘彈隨  
空斂笑獻楚自多傷一朝殊默語千里暴炎  
涼炎涼幾遷賀川陸疲臻湊積水架吳濤連  
山橫楚岫風月雖殊昔星河猶是舊姑蘇望  
南浦邨鄆通北斗北斗平生親南浦別離津  
瀟湘一超忽洞庭多苦辛秋江無綠芷寒汀

有白蘋采之將何遺故人漳水濱漳濱已遠  
遠江潭未旋返爲聽短歌行當想長洲苑露  
金薰芻岸風珮搖蘭坂蟬鳴稻葉秋鴈起蘆  
花晚晚秋雲日明亭臬風霧清獨負平生氣  
空牽搖落情占星非聚德夢月詎懸名寂寥  
傷楚奏淒斷泣秦聲秦聲懷舊里楚奏悲無  
已郢路少叢臺叢臺富奇士溫輝凌愛日壯  
氣驚寒水一願重風雲三冬足文史文史盛  
紛綸京洛多風塵猶輕五車富未重一囊貧

李仙非易託蘇鬼曲難因不惜勞歌盡誰爲  
聽陽春

秋日山行簡梁大官

乘馬陟層阜迴首睇山川攢峯銜宿霧疊巘  
架寒煙百重含翠色一道落飛泉香吹分巖  
桂鮮雲抱石連地偏心易遠致默體逾玄得  
性靈遊刃忘言已棄筌彈冠勞巧拙結綬倦  
牽纏不如從四皓丘中鳴一絃

晚泊江鎮

四運移陰律三翼泛陽侯荷香銷晚夏菊氣  
入新秋夜烏喧粉堞宿鴈下蘆洲海霧籠邊  
徼江風繞戍樓轉蓬驚別渚逃名謝蟻丘還  
嗟帝鄉遠空望白雲浮

晚渡黃河

千里尋歸路一葦亂平源通波連馬頰迸水  
急龍門照日榮光渾驚風瑞浪翻棹唱臨風  
斷樵謳入聽喧岸迥秋霞落潭深夕霧繁誰  
堪逝川上日暮他鄉魂

晚憇田家

轉蓬勞遠役披薜下田家山形類九折江勢  
急三巴懸梁接斷岸澁路擁崩查霧巖淪曉  
魄風淑漲寒沙心迹一朝舛關山萬里賒龍  
章徒表越閩俗本非華旅行悲泛梗離贈斷  
踈麻唯有寒潭菊獨似故園花

宿山庄

金陵一超忽玉燭幾還周露積吳臺草風入  
郢門楸林虛宿斷霧磴險掛懸流拾青非漢

策緇化類秦裘牽迹猶多蹇勞生未寡尤獨  
此他鄉夢空山明月秋

出石門

層巖遠接天絕嶺上棲煙松低輕蓋偃膝細  
弱鈎懸石明如掛鏡苔分似列錢暫策爲龍  
杖何處得神仙

至分陝

陝西關勝壤邵南分沃疇列樹巢維鵲平渚  
下睢鳩憩棠疑忽剪曳葛似攀樛至今王化

美非獨在隆周

夏日夜憶張二

伏枕憂思深擁膝獨長吟烹鯉無尺素筌魚  
勞寸心踈麻空有折芳桂湛無斟廣庭含夕  
氣閑宇澹虛陰織蟲垂夜砌驚鳥棲暝林驩  
娛百年促羈病一生侵詎堪孤月夜流水入  
鳴琴

寓居洛濱對雪憶謝二

旅思眇難裁衝飈限易哀曠望洛川晚飄飄

瑞雪來積彩明書帳流韻繞琴臺色奪迎仙  
羽花避犯靈梅謝庭賞方逸袁扉掩未開高  
人儻有訪興盡詎須迴

北眺春陵

攢轡疲宵邁驅馬倦晨興既出封泥谷還過  
避雨陵山行明照上谿宿密雲蒸登高徒欲  
賦詞殫獨撫膺

夏日遊目聊作

暫屏囂塵累言尋物外情致逸心逾默神幽  
體自輕浦夏荷香滿田秋麥氣清詎假滄浪  
上將濯楚臣纓

同崔駙馬曉初登樓思京

麗譙通四望繁憂起萬端綺踈低晚魄鏤檻  
肅初寒白雲鄉思遠黃圖歸路難唯餘西向  
笑暫似當長安

月夜有懷簡諸同病

閒庭落景畫踈簾夜月通山靈響似應水淨  
望如空棲枝猶繞鵲遵渚未來鴻可歎高樓

婦悲思香難終

叙寄員半千

薄宦三河道自負十餘年不應驚若厲祇爲  
直如弦坐歷山川險吁嗟陵谷遷長吟空抱  
膝短翮詎冲天魂歸滄海上望斷白雲前釣  
名勞拾紫隱迹自談玄不學多能聖徒思鴻  
寶仙斯志良難已此道豈徒然嗟爲刀筆吏  
耻從繩墨牽岐路情雖狎人倫地本偏長揖  
謝時事獨往訪林泉寄言二三子生死不來

旋

詠懷古意上裴侍郎

二十二餘罷鬢是潘安仁四十九仍入年非  
朱買臣縱橫愁繫越坎壈倦遊秦出籠窮短  
翮委轍涸枯鱗 不需用彈鋏欲誰申天  
子未驅策歲月幾沉淪輕生長慷慨效死獨  
殷勤徒歌易水客空老渭川人一得視邊塞  
萬里可苦辛劔匣胡霜影開弓漢月輪金方  
動秋色鐵騎想風塵爲國堅誠款捐軀志賤



貧勒功思比憲決略暗欺陳若不犯霜雪虛  
擲玉京春

寒夜獨坐遊子多懷簡知己

故鄉眇千里離憂積萬端鶉服長悲碎蝸廬  
未卜安富鈎徒有想貧鋏為誰彈柳秋風葉  
脆荷晚露文團晚金叢岸菊餘佩下幽蘭伐  
木傷心易維乘歸去難獨有孤明月時照客  
庭寒

春夜韋明府宅宴

酌桂陶芳夜披薜嘯幽人雅琴馴魯雉清歌  
落范塵宿雲低迥蓋殘月上虛輪幸此承恩  
洽聊當故鄉人

送宋五之問得涼字

願言遊泗水支離去二漳道術君所篤筌蹄  
余自忘雪威侵竹吟秋爽帶池涼欲驗離襟  
切岐路在他鄉

七言古詩

帝京篇

山河千里國城闕九重門不覩皇居壯安知  
天子尊皇居帝里峻函谷鶉野龍山侯甸服  
五緯連影集星躔八水分流橫地軸秦塞重  
關一百二漢家離宮三十六桂殿陰岑對玉  
樓椒房窈窕連金屋三條九陌麗城隈萬戶  
千門平旦闢複道斜通鳩鵲觀交衢直指鳳  
凰臺劔履南宮入簪纓北闕來聲明冠裳宇  
文物象昭回鈎陳肅蘭所壁沼浮槐市銅羽  
應風迴金莖承露起校文天祿閣習戰昆明

水朱邸抗平臺黃扉通戚里平臺戚里帶崇  
墉炊金饌玉待鳴鍾小堂綺帳三千戶大道  
青樓十二重寶蓋彫鞍金絡馬蘭窓繡柱玉  
盤龍綺柱璇題粉壁映鏘金鳴玉王侯盛王  
侯貴人多近臣朝遊北里暮南隣陸賈分金  
將讌喜陳遵投轄尚留賓趙李經過密蕭朱  
交結親丹鳳朱城白日暮青牛紺幘紅塵度  
俠客珠彈垂楊道倡婦銀鈎采薪路倡家桃  
李自芳菲京華遊俠盛輕肥延年女弟雙飛

入羅敷使君千騎歸同心結縷帶連理織成  
衣春朝桂樽樽百味秋夜蘭燈燈九微翠幌  
珠簾不獨映清歌寶瑟自相依且論二十八  
年是寧知四十九年非古來榮利若浮雲人  
生倚伏信難分始見田竇相移奪俄聞衛霍  
有功勲未厭金陵氣先開石槨文朱門無復  
張公子灞亭誰畏李將軍相顧百齡皆有待  
居然萬化咸應改桂枝芳氣已銷亡栢梁高  
宴今何在莫矜一旦擅豪華自言千載長驕

奢倏忽搏風生羽翼須臾失浪委泥沙黃雀  
徒巢桂青門遂種瓜黃金銷鑠素絲變一貴  
一賤交情見紅顏宿昔白頭新脫粟布衣輕  
故人故人有湮淪新知無意氣灰死韓安國  
羅傷翟廷尉已矣哉歸去來馬卿辭蜀多文  
藻揚雄仕漢乏良媒三冬自矜成足用十年  
不調幾遭迴汲黯薪逾積孫洪閣未開誰惜  
長沙傳獨負洛陽才

少年重英俠弱歲賤衣冠既託寰中賞方承  
膝下歡遨遊灞陵曲風月洛城端且知無玉  
饌誰肯逐金丸金丸玉饌盛繁華自言輕侮  
季倫家五霸爭馳千里馬三條競鶩七香車  
掩映飛軒乘落照參差步障引朝霞池中舊  
水繞懸鏡屋裏新粧不讓花意氣風雲倏如  
昨歲月春秋屢迴薄上苑頻經柳絮飛中園  
幾番梅花落當時門客今何在疇昔交遊已  
踈索莫教憔悴損容儀會得高秋雲霧廓  
留坐帝鄉無事積炎涼一朝披短褐六載奉  
長廊賦文慙昔馬執戟慕前楊揮戈出武帳  
荷筆入文昌文昌隱隱皇城裏由來奕奕多  
才子潘陸詞鋒駱驛飛張曹翰苑縱橫起鄉  
相未曾識王侯寧見擬徒勞倦負薪何處逢  
知己判將運命賦窮通從來奇舛任西東不  
永棄同芻狗且復飄飄類轉蓬容髮年年  
異春花歲歲同榮親未盡禮徇主欲申功脂  
車秣馬辭鄉國縈轡西南使珂轆玉壘銅梁

不易攀地角天涯眇難測鶯轉蟬吟有悲望  
鴻來鴈度無音息陽關積霧萬里昏劔閣連  
山千里色蜀路何悠悠岷峯阻且脩迴腸隨  
九折迸淚連雙流寒光千里暮露氣二江秋  
長途看束馬平水且沉牛華陽舊地標神制  
石鏡娥眉真秀麗諸葛才雄已號龍公孫躍  
馬輕稱帝五丁卓犖多竒力四士英靈用文  
藝雲氣橫開八陣形橋影遙分七星勢川平  
煙霧開遊戯錦城隈墉高龜望出水淨鴈文

迴尋妹入酒肆訪客上琴臺不識金貂重偏  
惜玉山頽他鄉冉冉消年月帝里沉沉限城  
闕不見猿聲助客啼唯聞旅思將花發我家  
迢迢關山裏關山迢迢不可越故園梅柳尚  
有餘春來勿使芳菲歇解袂欲言歸執袂愴  
多違北梁俱握手南浦共沾衣別情傷去蓋  
離念惜光輝稍卯有何託木落有南飛平陸  
春來酒應熟相將園閣望青溪且用藤盃泛  
黃菊十年不調為貧賤百日屢遷隨倚伏祇

為須求負郭田使我再干州郡祿百年鬱鬱  
少騰遷萬里迢迢入鏡川涘江沸潮衝白浪  
淮海長波接遠天叢竹凝朝露孤山起暝煙  
賴有邊城月常伴客旌懸東南美箭稱吳會  
名都隱軫三江外塗山執玉應昌期曲水開  
襟重文會仙鏞流音鳴鶴嶺寶劔分輝落蛟  
瀨未看白馬對蘆芻且覺浮雲似車蓋江南  
節序多文酒屢經過共踏春江曲俱唱采菱  
歌舟移疑入鏡棹舉若乘波風光無限極歸

檝礙池荷眺聽煙霞正流盼即從王事歸艫  
轉芝田花發屢徘徊金谷明重遊衍登高  
南適咄梁叟憑軾西征想潘椽岸闌華岳聳  
疑蓮水激龍門急如箭人事謝光陰俄遭霜  
露侵偷存七尺影分役九泉深窮途行泣玉  
憤路未歲金茹荼徒有歎懷橘獨傷心年來  
歲去成銷鑠懷抱心期漸寥落掛冠裂冕已  
辭榮南畝東臬事耕鑿賓階客院常踈散蓬  
徑柴扉終寂寞自有林泉堪隱棲何必山中

事丘壑我住青門外家臨素澹濱遙瞻丹鳳  
闕斜望黑龍津荒衢通獵騎窮巷抵樵輪時  
有桃源客來訪竹林人昨夜琴聲奏悲調旭  
旦含顰不成笑果乘駘馬發囂書復道郎官  
稟綸誥冶長非罪曾縲絰長孺然灰也經溺  
高門有閣不圖封峻筆無聞斂敷妙適離京  
兆謗還從御府彈炎威資夏景平曲况秋翰  
畫地終難入書空自不安吹毛未可待搖尾  
且求食丈夫坎壈多怨疾契闊迤邐盡今日

慎罰寧憑兩造辭嚴科直掛三章律鄒衍銜  
悲衝燕獄李斯抱怨拘秦格不應白髮頓成  
絲直爲黃沙暗如漆紫禁終難叫朱門不易  
排驚魂聞葉落危魄逐輪埋霜威遙有勵雪  
杜更無階含冤欲誰道飲氣獨居懷忽聞驛  
使發關東傳道天波萬里通涸轍去鱗先逝  
海幽禽釋網便翔空舜澤堯曦方有極讒言  
巧佞讜無窮誰能躅迹依三輔會就商山訪  
四翁

行軍軍中行路難

君不見封狐雄虺自成群  
憑深負固結妖氛  
玉璽分兵徵惡少  
金壇授律動將軍  
將軍擁旄宣廟略  
戰士橫戈靜夷落  
長驅一息背銅梁  
直指三危登劔閣  
閣道迢迢起戍樓  
劔門遙裔俯靈丘  
叩關九折無平路  
江水雙源有急流  
征役無期返他鄉  
歲月晚杳杳丘陵出  
蒼蒼林薄遠途危  
紫蓋峯路澁青泥坂去去  
指哀牢行行入不毛  
絕壁千里險連山四望

高中外分區宇  
夷夏殊風土  
交趾枕南荒  
昆彌臨北戶  
川源饒毒霧  
谿谷多淫雨  
行潦四時流  
崩崖千歲古  
漂梗飛蓬不暫安  
捫藤引葛陟危巒  
昔時聞道從軍樂  
今日方知行路難  
滄江綠水東流駛  
炎州丹徼南中地  
南中  
南斗映星河  
秦關秦塞阻煙波  
三春邊地風光少  
五月瀘川瘴癘多  
朝驅疲斥候  
夕息倦樵歌  
向月彎繁弱  
連星轉太阿  
重義輕生懷一顧  
東征西伐凡幾度  
夜夜朝朝斑髮新年



年歲歲戎衣故灞城  
隔滇池水天涯望轉積  
地際行無已徒覺炎涼節  
物非不知關山千萬里  
棄置勿重陳征行多苦辛  
且悅清笳梅柳曲詎憶芳園  
桃李人絳節紅旗分日羽丹  
心白刃酬明主但令一被君王  
知誰憚三邊征戰苦行路難  
幾千端無復歸雲憑短翰空  
餘望日想長安

行路難

君不見玉關塵色暗邊庭  
銅鞮雜虜寇長城

天子按劍徵餘勇將軍受脰事橫行  
七德龍韜開玉帳千里鼉鼓疊金鉦  
陰山苦霧埋高壘交河孤月照連營  
連營去去無窮極擁旆遙遙過絕國  
陣雲朝結晦天山寒沙夕漲迷  
疏勒龍鱗水上開魚貫馬首山前振  
雕翼長驅萬里讐祁連分麾三命武  
功宣百發烏號遙碎柳七尺龍文迥  
照蓮春來秋去移灰瑄蘭閨柳市芳  
塵斷鴈門迢遞尺書稀鴛鴦被相思  
雙帶緩行路難誓令氛祲靜皋蘭但  
使封

侯龍額貴詎隨中婦鳳樓寒

艷情代郭氏荅盧照鄰

迢迢芊路望芝田  
眇眇函關恨蜀川  
歸雲已落涪江外  
還鴈應過洛水壘  
洛水傍連帝城側  
帝宅層臺垂鳳翼  
銅駝路上柳千條  
金谷園中花幾色  
柳葉園花處處新  
洛陽桃李應芳春  
妾向雙流窺石鏡  
君住三川守玉人  
此時離別那堪道  
此日空牀對芳沼  
芳沼徒遊比目魚  
幽徑還生拔心草  
流風迴雪儻便娟

驢子魚文實可憐  
擲果河陽君有分  
貨酒成都妾亦然  
莫言貧賤無人重  
莫言富貴應須種  
綠珠猶得石崇憐  
飛燕曾經漢皇寵  
良人何處醉縱橫  
直如循默守空名  
倒提新練成慊慊  
翻將故劔作平平  
離前吉夢成蘭兆  
別後啼痕上竹生  
別日分明相約束  
已取宜家成誠勗  
當時擬弄掌中珠  
豈謂先摧庭際玉  
悲鳴五里無人問  
腸斷三聲誰爲續  
思君欲坐望夫臺  
端居懶聽將雛曲  
沉沉落日向山

低簷前歸燕並頭栖抱膝當窓聽夕鬼側耳  
空房聽晚鷄舞蝶臨階祗自舞啼鳥逢人亦  
助啼獨坐傷孤枕春來悲更甚峨眉山上月  
如眉濯錦江中霞似錦錦字迴文欲贈君劒  
壁層峯自糾紛平江淼淼分青浦長路悠悠  
間白雲也知京洛多佳麗也知山岫遙虧蔽  
無那短封即踈索不在長情守期契傳聞織  
女對牽牛相望重河隔淺流誰分迢迢經兩  
歲誰能脉脉待三秋情知唾井終無理情知  
覆水也難收不復下山能借問更向盧家字  
莫愁

代女道士王靈妃贈道士李榮

玄都五府風塵絕碧海三山波浪深桃實千  
年非易待桑田一變已難尋別有仙居對三  
市金闕銀宮相向起臺前鏡裏伴仙娥樓上  
簫聲隨鳳史鳳樓迢迢絕塵埃鸞時物色正  
徘徊靈芝紫檢參差長仙桂丹花重疊開雙  
童綽約時遊陟三鳥聯翩報消息盡言真侶

出遨遊傳道風光無限極輕花委砌惹裾香  
殘月窺窓覘愧色箇時無數併妖妍箇裏無  
窮總可憐別有象中稱黜帝天上人間少流  
例洛濱仙駕啓遙源淮浦靈津符遠筮自言  
少小慕幽玄只言容易得神仙佩中邀勒經  
時序簫裏尋思復幾年尋思許事真情變二  
八容華識少選漫道燒丹止七飛空傳化石  
曾三轉寄語天上弄機人寄語河邊值查客  
乍可忽忽共百年誰使遙遙期七夕想知人

意自相尋果得深心共一心一心一意無窮  
已投漆投膠非定擬只將羞澁當風流持此  
相憐保終始相憐相念倍相親一生一代一  
雙人不投丹心比玄石惟將濁水况清塵只  
言柱下留期信好欲將心學松薜不能京兆  
畫娥眉翻向成都騁騶引青牛紫氣度靈關  
尺素施鱗去不還連苔上砌無窮綠修竹臨  
壇幾處斑此時空牀難獨守此日別離那可  
久梅花如雪柳如絲年去年來不自持初言

別在寒偏在何悞春來春更思春時物色無  
端緒雙枕孤眠誰分許分念嬌鶯一種啼生  
憎燕子千般語朝雲旭日照青樓遲暉麗色  
滿皇州落花泛泛浮靈沼垂柳長長拂御溝  
御溝大道多奇賞侯客妖容遞來往寶騎車  
花鐵作錢香輪鶩水珠為網香輪寶騎競繁  
華可憐今夜宿倡家鸚鵡杯中浮竹葉鳳凰  
琴裏落梅花許葦多情偏送款為問春花幾  
時滿千回鳥信說衆諸百過鶯啼說長短長

短衆諸判不尋千回百過浪關心何曾舉意  
西隣玉未肯留情南陌金南陌西鄰成自保  
還轡歸期湏及早為想三春狹斜路莫辭九  
折叩關道假令白里似長安使青牛學劍  
端蘋風入馭來應易竹杖成龍去不難龍駮  
去去無消息鸞鏡朝朝減容色君心不記下  
山人妾欲空期上林翼上林三月鴻欲稀華  
表千年鶴未歸不分淹留乘路待祗應直取  
桂輪飛

駱賓王集卷上

駱賓王集卷下

五言律詩

在獄詠蟬并序



余禁所禁垣西是法廳事也有古槐數株焉  
雖生意可知同殷仲文之古樹聽松斯在即  
周召伯之甘棠每至夕照低陰秋蟬踈引發  
聲幽息有切嘗聞豈人心異於曩時將虫響  
悲於前聽嗟乎聲以動容德以象賢故潔其  
身也稟君子達人之高行蛻其皮也有仙都

羽化之靈姿候時而來順陰陽之數應節爲  
變審箴用之機有目斯開不以道昏而昧其  
視有翼自薄不以俗厚而易其真吟喬樹之  
微風韻資天縱飲高秋之墜露清畏人知僕  
失路艱虞遭時微纏不哀傷而自怨未搖落  
而先衰聞螻蛄之聲悞平反之已奏見蟾  
螂之抱影怯危機之未安感而綴詩貽諸知  
已庶情公物應哀弱羽之飄零道寄人知憫  
餘聲之寂寞非謂文墨取代幽憂云爾

西陸蟬聲唱南冠客思侵那堪玄髮影來對  
白頭吟露重飛難進風多響易沉無人信高  
潔誰為表予心

於紫雲觀贈道士并序

余鄉國一辭江山萬里昔年離別還同塞北  
之鳥今日歸來即似遼東之鶴先生情均得  
免忘筌之契已深路是忘羊分歧之恨逾切  
不題短什何汰衷衿  
碧落澄秋景玄門啓曙關人疑列禦至客似

令威還羽蓋徒欣仰雲車未可攀只應傾玉  
醴時許寄顏顏

渡瓜步瓜

捧檄辭幽徑鳴榔下貴洲驚濤疑躍馬積氣  
似連牛月迥黃沙淨風急夜江秋不學浮雲  
影他鄉空滯流

途中有懷

睠然懷楚奏悵矣昔秦關涸鱗驚照轍墜羽  
怯虛彎素服三川化烏裘十上還莫言無皓

齒時俗薄朱顏

至汾水戍

行役忽離憂復此愴分流濺石迴湍咽紫叢  
曲澗幽陰崖常結晦宿莽競含秋况乃霜晨  
早寒風入戍樓

望鄉夕泛

歸懷到不安促榜犯風瀾落宿舍樓近浮月  
帶江寒喜逐行前志憂從望裏寬今夜南枝  
鵲應無繞樹難



久客臨海有懷

天涯非日觀地此望星樓練光搖亂馬劍氣  
上連牛草濕姑蘇夕葉下洞庭秋欲知悽斷  
意江上涉安流

遊兗部逢孔君自衛來欣然相遇若

舊

遊人自衛返客背隔淮來傾蓋金蘭合忘筌  
玉葉開繁花明日柳疎葢落風梅將期重交  
態時慰不然灰

西京守歲

閒居寡言晏獨坐慘風塵忽見嚴冬盡方知  
列宿春夜將寒色去年共曉光新耿耿他鄉  
夕無由展舊親

白雲抱幽石

重巖抱危石幽澗曳輕雲繞鎮仙衣動飄蓮  
羽蓋分錦色連花靜苔光帶葉薰詎知吳會  
影長抱穀城文

春雲處處生

千里年光靜四望春雲生暫日祥光舉踈雲  
瑞葉輕蓋陰籠迥樹陣影抱危城非將吳會  
遠飄蕩帝鄉情

同辛簿簡仰酬思玄上人林泉四首

聞君招隱地髣髴武陵春緝艾知還楚披榛  
似避秦崩查年祀積幽草歲時新一謝滄浪  
水安知有逸人

芳晨臨上月幽賞狎中園有蝶堪成夢無羊  
可觸藩忘懷南澗藻蠲思北堂萱坐歎華滋

歇思君誰爲言

林泉恣探歷風景暫徘徊客有遷鶯處人無  
結駟來聚花如薄雪沸水若輕雷今日徒招  
隱終知異鑿坏

俗遠風塵隔春還初服遲林疑中散地人似  
上皇時芳杜湘君曲幽蘭楚客詞山中有春  
草長似寄相思

秋日送陳文林陸道士

青牛遊華岳赤馬走吳宮玉桂離鴻怨金壘

浮蟻空日霽峯陵雨塵起洛陽風唯當玄度  
月千里與君同

送鄭少府入遼

邊烽警榆塞俠客度桑乾柳葉開銀鏑桃花  
照玉鞍滿月臨弓影連星入劔端不學燕丹  
客空歌易水寒

送費六還蜀

星樓望蜀道月破指吳門萬行流別淚九折  
切驚魂雪影含花落雲陰帶葉昏還當三徑

晚獨對一清尊

秋日送侯四

我留安豹隱君去學鵬搏岐路分襟易風雲  
促膝難夕漲流波急秋山落日寒惟有思歸  
引悽斷爲君彈

秋日送尹大赴京

掛瓢余隱舜負鼎爾干湯竹葉離罇滿桃花  
別路長低河耿秋色落月抱寒光素書如可  
嗣幽谷竚賓行

秋夜送閻五

通庄抵舊里溝水泣新知斷雲飄易滯連露  
積難披素風啼迥蝶驚月繞踈枝無力勵短  
翰輕舉送長離

送王明府上京參選

振衣遊紫府飛蓋背青田虚心恒警露孤影  
尚凌煙離歌悽妙曲別引繞繁絃在陰如可  
和清響會聞天

秋日送別

寂寥心事晚搖落歲時秋共此傷年髮相看  
惜去留當歌應破涕哀命返窮愁別後能相  
憶東陵有故侯

別李嶠

芳尊徒自滿別恨轉難勝客似遊江岸人疑  
上灞陵寒更承夜永涼景向秋澄離心何以  
贈自有玉壺冰

在兗州餞宋五之問

淮尼泗水地梁甫汶陽東別路青驪遠離尊

綠蟻空擲寒凋密翠棠晚落踈紅別後相思  
曲悽斷入琴風

遊靈公觀

靈峯標勝境神府枕通川玉殿斜臨漢金堂  
迥架煙斷風踈晚竹流水切寒絃別有青門  
外空懷玄圃仙

夏日遊山家同夏少府

返照下層岑物外狎招尋蘭徑薰幽佩槐庭  
落暗金谷靜風聲徹山空月色深一遣樊籠

累唯余松桂心

初秋登司馬樓宴

展驥端居暇登龍嘉宴同締賞三清滿承歡  
六義通野晦寒陰積潭虛夕照空顧慙非夢  
鳥濫此厠彫蟲

初於六宅宴

千里風雲契一朝心賞同意盡深交冷神靈  
俗累空草帶銷寒翠花枝發夜紅唯將淡若  
水長揖古人風

冬日宴

二三物外友一百杖頭錢賞洽袁公地情披  
樂令天促膝鸞觴滿當爐獸炭然何須攀桂  
樹逢此自留連

鏤鷄子

幸過清明節欣逢舊練人刻花爭臉態寫月  
競眉新暈罷空餘月詩成併道春誰知懷玉  
者含響未吟晨

詠雲酒

朔空曾紀曆帶地舊疏泉色泛臨碭瑞香流  
赴蜀仙款交欣散玉洽友悅沉錢無復中山  
賞空吟吳會篇

詠美人在天津橋

美女出東隣容與在天津動衣香滿路移步  
韞生塵水上看粧影眉頭畫月新寄言曹子  
建箇是洛川神

憲臺出紮寒夜有懷

獨坐懷明發長謠苦未安自應迷北叟誰肯

問南冠生死交情異殷憂歲序闌空餘朝夕  
鳥相伴夜啼寒

送郭少府

開筵抗德水輟棹艤仙舟貝闕桃花浪龍門  
竹箭流當歌悽別曲對酒泣離憂還望青門  
外空見白雲浮

餞駱四二首

平生何以樂斗酒夜相逢曲中驚別緒醉裏  
失愁容星月懸秋漢風香入曙鍾明月臨溝

水青山幾萬重

甲子驅車入良宵秉燭遊人追竹林會酒獻  
菊花秋霜吹飄無已星河漫不流重嗟歡賞  
地翻召別離憂

冬日過故人任處士書齋

神交尚殺漆虛室罷遊蘭網積窓文亂苔深  
履迹殘雪明書帳冷水靜墨池寒獨此琴臺  
上流水爲誰彈

塵灰

洛川流雅韻秦道擅苛威聽歌梁上動應律  
管中飛光飄神女襪影落羽人衣願言心未  
翳終異效輕微

秋晨同淄州毛司馬秋九詠

紫陌炎氣歇青蘋晚吹浮亂竹搖踈影縈池  
織細流飄香曳舞袖帶泛粧樓不分君恩  
絕紈扇曲中秋

秋雲

南陸銅渾改西郊玉葉輕泛搖光動臨

瑞色明蓋陰連鳳闕陣影翼龍城誰知時不  
遇空傷流滯情

秋蟬

九秋行已暮一枝聊暫安隱榆非諫楚噪柳  
異悲潘分形粧薄髮鏤影飾危冠自憐踈影  
斷寒林夕吹寒

秋露

玉關寒氣早金塘秋氣歸泛掌光逾靜添荷  
滴尚微變霜凝曉液承月委圓輝別有吳臺



上應濕楚臣衣

秋月

雲披玉繩淨月滿鏡輪圓  
裊露珠暉冷凌霜  
桂影寒漏彩含踈薄浮光漾急瀾  
西南徒自賞南飛終未安

秋水

金闕寒流徹玉輪秋浪清  
圖雲錦色淨寫月  
練花明泛曲鷗絃動隨軒鳳  
轄驚唯當御溝上  
悽斷送歸情

秋螢

玉虬分靜夜金螢照晚涼  
含輝凝泛月帶火  
怯凌霜散彩縈虛牖  
飄花繞洞房下帷如不  
倦當解惜餘光

秋菊

擢秀三秋晚開芳十步中  
分黃俱笑日含翠  
共搖風碎影含流動  
浮香隔岸通金翹  
徒可泛玉笋竟誰同

秋鴈

聯翩辭海曲遙曳指江千陣去金河冷書歸  
玉塞寒帶月凌空易迷煙逗浦難何當同顧  
影刷羽泛清瀾

詠水

列名通地紀踈派合天津波隨月色淨態逐  
桃花春照霞如隱石映柳若沉鱗終當挹上  
善屬意淡交人

詠鴈

唼藻蒼梧遠銜蘆紫塞長霧深迷晚景風急  
斷秋行陣照通宵月書封幾夜霜無復能鳴  
分空知愧稻梁

詠雪

龍雲玉葉上鶴雪瑞花新影亂銅烏吹光銷  
玉馬津含輝明素篆隱迹表祥輪幽蘭不可  
儷徒自繞陽春

王昭君

歛容辭豹尾緘怨度龍鱗金鈿明漢月玉筋  
染胡塵古鏡菱花暗愁眉柳葉顰唯有清笳

曲時聞芳樹春

樂大夫挽詞

可歎浮生促吁嗟此路難丘陵一起恨言笑  
幾時懽蕭索郊埏晚荒涼井陘寒誰當門下  
客獨見有任安

蒿里誰家地松門何代丘百年三萬日一別  
幾千秋返照寒無影窮泉凍不流居然同物  
化何處欲藏舟

昔去梅笳發今來薤露晞彤駟朝帝闕丹旌  
背王城畿郭猶疑是原陵稍覺非九原如可  
作千載與誰歸

一旦先朝菌千秋掩夜臺青鳥新兆去白馬  
故人來草露當春泣松風向暮哀寧知荒隴  
外弔鶴自徘徊

忽見泉臺路猶疑水鏡懸何如開白日非復  
觀青天華表迎千歲幽扃送百年獨嗟流水  
引長掩伯牙絃

丹陽刺史挽詞

百齡嗟倏忽一旦附山河丹桂鎖已盡青松  
哀思多薰風慮聽曲薤露反成歌自有藏舟  
處誰憐隙駟過

惻愴恒山羽留連棣萼篇佳城非舊日京兆  
即新阡城郭三千歲丘陵幾萬年唯餘松柏  
隴朝夕起寒煙

短歌三獻曲長夜九泉臺此室玄扃掩何年  
白日開荒郊踈古木寒隧積陳芟獨此傷心  
地松聲薄暮來

五言排律

浮槎

遊目川上觀一浮查泛泛然若木偶之乘流  
迷不知其所適也觀其根柢盤屈枝幹扶踈  
大則有棟梁舟楫之材小則有輪轆榱桷之  
用非夫稟乾坤之秀氣含宇宙之淳精孰能  
負凌雲旣日之姿抱積雪封霜之骨向使懷  
材幽藪藏穎重崑絕望於崑廊之榮遺形於  
斤斧之患固可垂蔭萬畝懸映九霄與建木

較其短長將大椿齊其年壽者而委根險岸  
託質畏途上為疾風衝颺所摧殘下為奔浪  
迅波所激射基由壤括勢以地危豈盛衰之  
理繫乎時封植之道存乎我一墜泉谷萬里  
飄淪與波浮沉隨時逝止雖殷仲文歎生意  
已盡孔宣父知朽質難彫然而遇良工逢仙  
客牛礪可託玉璜之路非遙匠石先談萬乘  
之器何遠故材與不用時也悲夫然知萬物  
之相應感者亦奚必同聲同氣而已哉感而

賦詩貽諸同疾云爾

昔負千尋質高臨九仞峯真心凌晚桂勁節  
掩寒松忽值風颺折坐為波浪衝摧殘空有  
恨擁腫遂無庸渤海三千里泥沙幾萬重似  
舟飄不定如梗泛何從仙客終難託良工豈  
易逢徒懷萬乘器誰為一先容

春霽早行

年華開早律霽色蕩芳晨城闕千門曉山河  
四望春御溝通太液戚里對平津寶瑟調中

婦金壘引上賓劇談推曼倩驚坐揖陳遵意  
氣一言合風期萬里親自惟安直道守拙忌  
因人談器非先木圖榮異後薪椰榆慙路鬼  
憔悴切波臣玄草終疲漢烏裘幾滯秦生涯  
無歲月岐路有風塵遠嗟太行道處處白頭  
新

晚度天山有懷京邑

忽上天山路依然想物華雲疑上苑葉雪似  
御溝花行嘆戎麾遠坐令衣帶賒交河浮絕  
塞弱水浸流沙旅思徒漂梗歸期未及瓜寧  
知心斷絕夜夜泣胡笳

晚泊河曲

三秋倦行役千里泛歸潮通波竹箭水輕舸  
木蘭橈金隄連曲岸貝闕影浮橋水淨千年  
近星飛五老遙疊花開宿浪浮葉下涼颺浦  
荷踈晚的津柳漬寒條恹惶勞梗泛悽斷倦  
蓬飄仙查不可託河上獨長謠

晚泊蒲類

二庭歸望斷萬里客心愁山路猶南屬河源  
自北流晚風連朔氣新月照邊秋竈火通軍  
壁烽煙上戍樓龍庭但苦戰鷲領會封侯莫  
作蘭山下空令漢國羞

早發淮口望盱眙

養蒙分四瀆習坎奠三荆徙帝留餘地封王  
表舊城岸昏涵蜃氣潮滿應鷄聲洲迥連沙  
靜川虛積溜明一朝從捧檄千里倦懸旌背  
流桐栢遠逗浦木蘭輕小山迷隱路大塊切  
勞生唯有負心在獨映寒潭清

遠使海曲春夜多懷

長嘯三秋晚端居百慮盈未安蝴蝶夢遽切  
魯禽情別島連寰海離魂斷戍城流星疑伴  
使行月似依營懷祿寧期遠牽時匪徇名艱  
虞行已遠時迹自相驚

早發諸暨

征夫懷遠路夙駕上危巒薄煙橫絕巘輕凍  
澁迴湍野霧連空暗山風入曙寒帝城臨灞

涖禹穴枕江干橘性行應化蓬心去不安獨  
掩窮途淚長歌行路難

過張平子墓

西鄂該通理南陽擅德音玉卮浮藻麗銅渾  
積思深忽懷今日昔非復昔時今日往豐碑  
閣風來古木吟惟歎窮泉下終鬱羨魚心

海曲書情

薄遊倦千里勞生負百年未能查上漢詎肯  
劔遊燕白雲照春海青山橫曙天江濤讓雙

壁渭水擲三錢坐惜風光晚長歌獨塊然

邊城落日

紫塞流沙北黃圖灞水東一朝辭俎豆萬里  
逐沙蓬候月恒持滿尋源屢鑿空野昏邊氣  
合烽迫戍煙通膂力風塵倦疆場歲月窮河  
流控積石山路遠崆峒壯志凌蒼兕精誠貫  
白虹君恩如可報龍劔有雌雄

蓬萊鎮

旅客春心斷邊城夜望高野樓凝海氣白鷺



似江濤結綬疲三入承冠泣二毛將飛憐弱  
羽欲濟乏輕舳賴有陽春曲窮愁且代勞

宿温城望軍營

虞地寒膠折邊城夜析聞兵符關帝闕天策  
動將軍戍靜胡笳徹沙明楚練分風旗翻翼  
影霜劔轉龍文白羽搖如月青山斷若雲煙  
踈疑卷被塵滅似銷氛投筆懷班業臨戎想  
顧勲還應雪漢耻持此報明君

和孫長史秋日卧病

霍地踈天府潘園近帝臺調絃三婦至置驛  
五侯來尚想歡娛洽吁嗟歲月催金壇分上  
將玉帳引瓌材決勝鯨波靜騰謀鳥谷開白  
雲淮水外紫陌灞陵隈節變驚衰柳笳繁思  
落梅調神和玉燭挾藻握珠胎悵矣欣懷士  
居然欲死灰還因承雅曲暫喜躍沉鯁

四月八日題七級

化城分鳥堞香閣俯龍川復棟侵黃道重簷  
架紫煙銘書非晉代壁畫是梁年霸略今何

在王宮尚歸然二帝曾遊聖三卿是偶賢昔  
茲遊勝侶超彼託良緣我出有爲界君登非  
想天悠悠青曠裏蕩蕩白雲前今日經行處  
曲音號蓋煙

早秋出塞寄東臺詳政學士

促駕逾三水長驅望五原天街分斗極地理  
接樓煩溪月明關隴胡雲聚塞垣山川殊物  
候風壤異涼溫戍古秋塵冷沙寒宿霧繁昔  
余迷學步投迹忝詞源蘭者延蘭閣蓬山款  
禁園影纓陪紱冕載筆偶瓊璠汲塚寧詳蠹  
秦牢詎辨寃一朝從篚服千里駕輕軒鄉夢  
隨魂斷邊聲入聽喧南圖終斂翮北上遽摧  
轅弔影慙連茹浮生倦觸藩數竒何以託桃  
李自無言

鄭安陽入蜀

彭山折坂外井絡少城隈地是三巴俗人非  
百里才長途君悵望別路我徘徊心賞風煙  
隔容華歲月催遙遙分鳳野去去轉龍媒道

錦非前邑鳴琴即舊臺  
劔門千仞起石路五  
丁開海客乘查渡  
仙童馭竹迴魂將離鶴遠  
思逐斷猿哀唯有雙鳧  
鳥飛去復飛來

在軍中贈先還知己

蓬轉俱行役瓜時獨未還  
魂迷金闕路望斷  
玉門關獻凱多慙霍  
論封幾謝班風塵催白  
首歲月損紅顏落鴈低  
秋塞驚鳧起暝鸞胡  
霜如劔鏑漠月似刀環  
別後邊庭樹相思幾  
度攀

和李明府

傳聞葉縣履飛向洛陽  
城馳道臨層掖津門  
對小平霞殘疑製錦  
雲度似飄纓藻挾潘江  
澈塵虛范甑清詎憐  
衝斗氣猶向匣中鳴

望月有所思

九秋涼風肅千里月華  
開圓光隨霧湛碎影  
逐波來似霜明玉砌如  
鏡寫珠胎曉色依關  
近邊聲雜吹哀離居分  
照耀怨緒共徘徊自  
繞南飛羽空忝北堂才

送吳七遊蜀

日觀分齊壤星橋抵蜀門  
桃花嘶別路竹葉  
瀉離罇夏盡蘭猶茂  
秋深柳尚繁霧銷山望  
迥風高野聽喧勞歌徒欲奏  
贈別竟無言唯  
有當秋月空照野人園

西行別東臺詳正學士

意氣坐相親關河別故人  
客似秦川上歌從  
易水濱塞荒行辨玉臺遠  
尚名綸洩井懷邊  
將尋源重漢臣上苑梅花早  
御溝楊柳新只

應持此曲別作邊城春

春晚從李長史遊開道林故山

幽尋極幽壑春望陟春臺  
雲光棲斷樹靈影  
入仙杯古藤依格上野徑約山隈  
落蘂翻風去流鸞滿樹來  
興闌荀御動歸路起浮埃

和王記室從趙王春日遊陀山寺

鳥旗陪訪道鷲嶺洽棲真  
四禪明靜業三空  
廣勝因祥河踈疊澗惠日皎重輪  
葉指龍宮密花明鹿苑  
春彫談筌奧旨妙辨漱玄津雅

曲終難和徒自奏巴人

冬日野望

故人無與晤安步陟山椒野靜連雲卷川明  
斷霧銷靈巖聞曉籟洞浦漲秋潮三江歸望  
斷千里故鄉遙勞歌徒自奏客魂誰爲招

夕次舊吳

維舟皆楚服振策下吳畿盛德弘三讓雄圖  
枕九圍黃池通霸業赤壁暢戎威文物俄遷  
謝英靈有盛衰行歎鴟夷沒遽惜湛盧飛地

古煙塵暗年深館宇稀山川四望是人事一  
朝非懸劔空留信亡珠尚識機鄭風遙可託  
關月眇難依西北雲逾滯東南氣轉微徒懷  
伯通隱多謝買臣歸唯有荒臺路薄暮濕征  
衣

過故宋

舊國千年盡荒城四望通雲浮非隱帝日舉  
類遊童綺琴朝化洽祥石夜論空馬去遙奔  
鄭蛇分近帶豐池文斂東水竹影漏寒叢園

兔承行月川 避斷風故宋誠難定從梁事  
未工唯當過周容獨愧吳臺空

傷祝阿王明府

并序

夫心之悲矣非關春秋之氣聲之哀也豈移  
金石之音何則事感則萬緒興端情應則百  
憂交軫是以宣尼舊館流襟動激楚之悲孟  
嘗高臺承睫下聞琴之淚祝阿王明府毓德  
丹穴襲吉黃裳靈基峙金闕之峯層源瀨玉  
輪之坂既而鴻飛漸陸將騁平與之龍鶴鳴

在陰爰絆朝歌之驥乃當名縣闕月德貫陳  
星豈徒遽切夢瓊掩沉連石嗟平輪銷桂魄  
驪珠毀貝闕之前斗散紫氛龍劔沒延平之  
水其昔承嘉惠曲荷恩光留連嘯歌從容風  
月撫心陳迹泣血漣沕然而始終者萬物之  
大歸生死者百年之常分雖則知理之可有  
而未曉情之可無聊綴悲歌敢貽同好諸君  
或締交三益列宰一司或叶契筌蹄投心膠  
漆如比肩於千里遽傷魂於九原既切芝焚

彌深蕙歎盡言四始同賦七哀庶蘭室流薰  
襲遺芳而化德故蓬心申拙效庸音於起予  
觸目多懷周增流動

洛川真氣上重泉惠政融含章光後列繼武  
嗣前雄契與良難驗生涯忽易窮翔鳧猶在  
履狎雉尚馴童錢滿荒階綠塵浮虛帳紅夏  
餘將宿草秋近未驚蓬煙晦泉門夕日遠夜  
臺空誰堪孤隴外獨聽白揚風

詠懷

少年識事淺不知交道難一言芬若桂四海  
臭如蘭寶劍思存楚金鎚許報韓虚心徒有  
託循迹諒無端太息關山險吁嗟歲月闌忘  
機殊會俗守拙異懷安阮籍空長嘯劉琨獨  
未懽十步庭芳斂三秋隴月團槐疎非盡意  
松晚夜凌寒悲調絃中急窮愁醉裏寬莫將  
流水引空向俗人彈

邊夜有懷

漢地行逾遠燕山去不窮城荒猶築怨碣毀

尚銘功古戍煙塵滿邊庭人事空夜闌明罷  
月秋塞急胡風倚伏良難定榮枯豈易通旅  
魂勞泛梗離恨斷征蓬蘇武封猶薄崔駟官  
不工惟餘北叟意欲寄南飛鴻

久戍邊城有懷京邑

擾擾風塵地遑遑名利途盈虛一易舛心迹  
兩難俱弱齡小山志寧期大丈夫九微光賁  
玉千仞忽彈珠棘寺游三禮蓬山遙入儒懷  
鈇慙後進投筆願前驅北走非通趙西之似

化胡錦車朝促候刁斗夜傳呼戰士青絲絡  
將軍黃石符連星入寶劔半月上彫弧拜井  
開踈勒鳴桴動密須戎機習短蒺袂授靜長  
榆季月炎初盡邊亭草早枯層陰籠古木窮  
色變寒蕪海鶴聲嘹唳城烏尾畢逋葭繁秋  
引色桂滿夕輪孤行役風霜久鄉園夢想孤  
灞池遙夏國秦海望陽紆沙塞三千里京城  
十二衢楊溝連鳳闕槐路擬鴻都壁殿規宸  
象金隄法斗樞雲浮西北盖月照東南隅寶



帳垂連理銀牀轉鹿盧廣筵留上客豐饌引  
中厨漏緩金徒箭嬌繁玉女壺秋濤飛喻馬  
春水泛仙艫意氣風雲合言忘道術趨共矜  
名已泰詎肯沫相濡有志慙彫朽無庸類散  
樗 山斬超忽形倦歎艱虞結網空知羨圖  
榮豈自誣忘情同塞馬比德類宛駒隴阪肝  
腸絕陽關亭隴迺迷魂驚落鴈離恨斷飛鳧  
春去榮華盡年來歲月無邊愁傷郢調鄉思  
繞吳歛河氣通中國山途限外區相思若可

寄冰泮有銜蘆

幽繫書情通簡知已

昔歲逢陽曆觀光賁楚材穴疑丹鳳起場似  
白駒來一命淪騷餌三緘慎禍胎不言勞倚  
伏忽此蓮遭迴駘馬刑章峻蒼鷹獄吏猜爭  
縑非易辨疑璧果難裁掞拙慙周道端憂滯  
夏臺生涯一滅裂岐路幾徘徊青陸芳春動  
黃沙旅思催圓扉長寂寂踈網尚恢恢入穿  
先搖尾迷津正曝顛覆盆徒望日蟄戶未驚

雷霜歇蘭猶敗風多木屢摧地幽蠶室閉門  
靜雀羅開自憫秦冤痛誰憐楚奏哀漢陽窮  
鳥客梁甫卧龍才有氣還衝斗無時會鑿坏  
莫言韓長孺長作不然灰

棹歌行

寫月圖黃罷凌波拾翠通鏡花搖芟日衣麝  
入荷風葉露舟難蕩蓮踈浦易空鳳媒羞自  
託鴛翼恨難窮秋帳燈光翠倡樓粉色紅相  
思無別曲併在棹歌中

五言絕句

在軍登城樓

城上風威冷江中水氣寒戎衣何日定歌舞  
入長安

於易水送人

此地別燕丹壯髮上衝冠昔時人已沒今日  
水猶寒

詠照

寫月無芳桂照月有花菱不持光謝水翻將

影學冰

挑燈杖

稟質非貪熟焦心豈憚熬終知不自潤何處  
用脂膏

詠塵

凌波起羅襪含風染素衣別有知音調聞歌  
應自飛

翫初月

息滿光恒缺乘昏影暫流自能明似鏡何用

曲如鈎

七言絕句

憶蜀地佳人

東西吳蜀關山遠魚來鴈去兩難聞莫怪常  
有千行淚只爲陽臺一片雲

駱賓王集卷下終

Large, faint watermark or stamp, possibly a library or collection mark, overlaid on the page.

Small square seal or stamp located in the bottom left corner of the page, containing characters in seal script.

